



Broj/Broj: 4/1-50-1-83-23/05
Sarajevo/Sarajevo, 02.06.2005. godine

ZAPISNIK

23. sjednice Zajedničke komisije Parlamentarne skupštine BiH za odbrambenu i sigurnosnu politiku i nadzor nad radom odbrambenih i sigurnosnih struktura na nivou BiH

Sjednica je održana 2.6.2005. godine, u vremenu od 10,30 do 13,30 sati.

Sjednici su prisustvovali članovi Zajedničke komisije: Boško Šiljegović, Branko Zrno, Seada Palavrić, Šefik Džaferović, Adem Huskić, Momčilo Novaković, Vinko Zorić, Halid Genjac i Anto Spajić.

Iz opravdanih razloga sjednici nisu prisustvovali: Osman Brka, Vinko Radovanović i Mirko Blagojević.

Sjednici su također prisustvovali gosti: dr. Raffi Gregorian i Nikola Radovanović, kopredsjedavajući Komisije za reformu odbrane, Ljiljana Trišić i Emir Pešto (Ministarstvo sigurnosti BiH) i Tanja Pašić (OSCE).

Osim navedenih, sjednici je prisustvovala Dragica Hinić, privremeni sekretar Komisije, Željko Grubešić, ekspert za pomoć u radu Komisije, i Anđelka Dobrilović (Istraživački odjel Parlamentarne skupštine BiH).

Za raspravu na sjednici predložen je sljedeći

DNEVNI RED

1. Informacija o regrutnom i rezervnom sastavu u Federaciji BiH i Republici Srpskoj (izvjestioci: kopredsjedavajući Komisije za reformu odbrane),
2. Informacija o stanju sigurnosti Bosne i Hercegovine u 2004. godini (Ministarstvo sigurnosti BiH),
3. Tekuća pitanja:
 - a) Informacija o prigovorima brigadira Faida Heće, Sabrije Zimića i Fehima Bibića na odluku o izboru profesionalnih vojnih lica u Ministarstvo odbrane BiH po raspisanom konkursu;
 - b) Zamolnica Misijske komisije BiH pri NATO-u u Bruxellu za informiranje o bitnim aktivnostima Zajedničke komisije za odbrambenu i sigurnosnu politiku BiH;
 - c) Kratka informacija o obavljenoj posjeti članova Zajedničke komisije Brčkom i Bijeljini;
 - d) Informacija o održanom sastanku PSNATO-a u Ljubljani;
 - e) Informacija o održanom sastanku sa Hubertom Pirkerom, predsjedavajućim Inicijative Pakta stabilnosti za borbu protiv organiziranog kriminala (SPOC) i prijedlog izbora člana Zajedničke

- komisije u ovu organizaciju;
- f) Informacija o odlasku pripadnika deminerske jedinice u Irak;
- g) Informacija o obilježavanju 5. godišnjice rada DGS-a;
- h) Informacija o predstojećim posjetama Makedoniji i Srbiji i Crnoj Gori

Boško Šiljegović je, na inicijativu Šefika Džaferovića, predložio dopunu dnevnog reda, tako da se kao prva tačka uvrsti izbor drugog zamjenika predsjedavajućeg Zajedničke komisije, što je jednoglasno prihvaćeno, kao i dnevni red u cjelini.

Ad. - 1. Izbor drugog zamjenika predsjedavajućeg Zajedničke komisije

Zbog prezauzetosti obavezama dosadašnjeg drugog zamjenika predsjedavajućeg Šefika Džaferovića, za drugog zamjenika predsjedavajućeg ove komisije predložena je Seada Palavrić, dok Šefik Džaferović ostaje i dalje član Zajedničke komisije.

Navedeni prijedlog jednoglasno je prihvaćen. O izboru novog drugog zamjenika predsjedavajućeg potrebno je obavijestiti Komisiju za reformu odbrane kako bi ona, u skladu sa svojim pravilima, također izvršila imenovanje Seade Palavrić za svog novog člana.

Ad. - 2. Informacija o regrutnom i rezervnom sastavu u Federaciji BiH i Republici Srpskoj (izvjestioci: kopredsjedavajući Komisije za reformu odbrane)

Dr. Raffi Gregorian na početku svog obraćanja izrazio je zadovoljstvo zbog poziva da prisustvuje sjednici Zajedničke komisije i svojim obraćanjem doprinese što boljoj saradnji dviju komisija, a što predstavlja neophodan uslov za dalji pozitivan tok reforme odbrane u BiH. Istaknuo je neophodnim informisanje Zajedničke komisije o dosadašnjem stadiju postignutog u procesu reforme rezervnog i regrutnog sastava u Federaciji BiH i Republike Srpske, pri tome naglasivši da su ovo bitna politička pitanja. Posebno je apostrofirao da pitanja regrutnog i rezervnog sastava čine samo dio cjelokupnog paketa reformi odbrane u BiH i da ih u ovom trenutku treba tako i posmatrati. Kako bi ova pitanja pravilno razumjeli, naveo je regionalni kontekst posmatranja. U okviru regionalnog konteksta, informirao je prisutne o obavljenim posjetama Hrvatskoj i Srbiji i Crnoj Gori, prilikom kojih su razmatrana ova pitanja, kao i reforme odbrane u cjelini. Prilikom posjete Hrvatskoj, koja je već članica PFP-a i na kraju je akcionog plana za ulazak u NATO, hrvatska strana istaknula je slične probleme koje ima i BiH u procesu reforme odbrambenog sistema, naglasivši da su već drastično smanjili vojni potencijal u skladu s NATO standardima, te da je dio plana i ukidanje regrutnog sastava. Razlozi za ukidanje regrutnog sastava su brojni, npr. izdvajanje velikog dijela budžetskih sredstava za tu namjenu. Slična situacija je i u Srbiji i Crnoj Gori, gdje je Ministarstvo odbrane nedavno izdalo informaciju o smanjenju vojnog potencijala i transformaciji, uključujući i vazduhoplovne i pomorske snage. Tako će ove snage biti manje od omjera utvrđenog Dejtonskim mirovnim sporazumom, a to je 5:2:2 kada je u pitanju odnos između brojnog stanja u Srbiji i Crnoj Gori i Bosni i Hercegovini.

Potom je obrazložio razloge za ukidanje regrutacije u BiH, posebno istaknuvši pitanje garantiranja sigurnosti putem regrutnog sastava, koji ni u kom slučaju ne podupire sigurnost naše zemlje posmatrano s aspekta utvrđenih NATO standarda. U tom kontekstu, Komisija za reformu odbrane dostavila je Savjetu ministara BiH i Predsjedništvu BiH dokument o razlozima zbog kojih bi trebalo ukinuti služenje vojnog roka. Iz tog dokumenta jasno je vidljivo da se ne može očekivati povećanje budžetskih sredstava za potrebe odbrane, već naprotiv, smanjenje. Ukidanjem regrutnog sastava postigle bi se znatne uštede sredstava. Sadašnji sistem je takav da regruti moraju izdvajati i vlastita sredstva tokom služenja vojnog roka, a ukupna izdvajanja za njihove potrebe trenutno iznose oko 22% od budžeta za odbranu u oba entiteta. I sam sistem obuke regruta zahtijeva angažiranost velikog broja aktivnih vojnih lica kao i civilnih lica u entitetskim ministarstvima na poslovima regrutovanja, što na kraju rezultira samo velikim brojem nedovoljno obučanih vojnika. Trenutno je ukupan dozvoljeni broj regruta u oba entiteta 60.000, a po nekim sazanjima regrutuje se i obučava

veći broj od dozvoljenog. Zbog navedenih razloga neophodno je privremeno obustaviti slanje regruta u vojsku, dok se ne odobri nova struktura oružanih snaga, kao dio paketa reformi odbrane. U vezi s mišljenjem javnosti o pitanju regrutnog sastava, istaknuo je da je EUFOR nedavno proveo anketu. Po toj anketi, 85% građana ispitanika i pripadnika sva tri naroda podržava trenutno ukidanje regrutnog sastava, tj. služenje vojnog roka i uvođenje profesionalne vojske, smatrajući da regrutni sastav predstavlja bacanje novca i vremena.

Ukoliko se podrži ova ideja i ukinе regrutni sastav, ideja o postojanju entitetskih ministarstava odbrane automatski gubi smisao. Na kraju izlaganja ponovo je naglasio da je ova informacija samo dio reformskog paketa odbrane i kao takvu je treba posmatrati.

Nikola Radovanović takođe je istaknuo da su ove informacije radni materijal i samo jedan dio modela reforme sistema odbrane. Stoga je predložio da se razmatraju isključivo informativno u okviru Zajedničke komisije, s obzirom da na domove Parlamentarne skupštine BiH treba uputiti konačan prijedlog materijala o cjelokupnoj reformi odbrambenog sistema. Potom je istaknuo tri pitanja. U vezi s pitanjem regionalnog pristupa problemu, istaknuo je da su tri ministra odbrane iz Hrvatske, Srbije i Crne Gore i Bosne i Hercegovine u bilateralnim kontaktima zaključili da u Bruxellesu imaju puno više informacija o zbivanjima u našim zemljama nego što mi to znamo jedni o drugima. Stoga je naš interes i obaveza da razmijenimo odgovarajuće informacije o pitanjima reformi odbrane, te da ubuduće nastojimo neposrednije i više kontaktirati i sarađivati na nivou ministarstava. Ovi kontakti već postoje na više nivoa, počevši od službenika ministarstava do nivoa ministara. Po njegovom mišljenju, stanje u oblasti reforme odbrane i u oružanim snagama sve tri države generalno je povoljnije nego što to javnost zna. O svim daljnjim saznanjima u vezi s događanjima u regionu naše ministarstvo odbrane blagovremeno će informirati Zajedničku komisiju i Parlamentarnu skupštinu BiH. Kao drugo pitanje, istaknuo je pitanje modela i brzine promjene odbrambenog sistema u BiH, pri čemu je naša zemlja u prednosti u odnosu na druge zemlje u regionu zbog prisustva snaga EUFOR-a i NATO-a, čije potencijale do sada nismo najbolje iskoristili, ali to možemo u narednom periodu. Ove snage predstavljaju garanciju sigurnosti naše zemlje i u narednim godinama. Treće pitanje odnosi se na sistem regrutovanja. U vezi s tim trebamo se opredijeliti za kvalitet i ukinuti regrutaciju iz svih naprijed navedenih razloga, te uvesti i razvijati profesionalne vojne snage. Pri tome treba istaći da ukidanje regrutacije ne znači i ukidanje obuke za poslove odbrane, jer će se godišnje obučavati kandidati za profesionalnu vojnu službu koji će biti zainteresirani za ispunjavanje NATO standarda i zasnivanje profesionalnog radnog odnosa. Na kraju je predložio da Zajednička komisija usvoji zaključak kojim ovu informaciju prima k znanju, pri čemu je ne upućuje u daljnju parlamentarnu proceduru, jer je ona radni materijal i samo jedan dio reformskog paketa.

Boško Šiljegović izrazio je zadovoljstvo zbog visokoprofesionalne saradnje Zajedničke komisije sa Komisijom za reformu odbrane i Ministarstvom odbrane BiH. Smatra da će Informacija naići na punu podršku svih članova Zajedničke komisije.

Šefik Džaferović predložio je članovima Zajedničke komisije da pruže punu podršku radu Komisije za reformu odbrane s kopredsjedavajućim na čelu, formirane odlukom visokog predstavnika za BiH. Potom je istaknuo da je prijatno iznenađen uvodnim izlaganjem Raffia Gregoriana o regionalnom kontekstu pitanja odbrane, jer se bez regionalnog pristupa ovo pitanje ne bi ni moglo riješiti. Zadovoljan je saznanjem da su susjedne zemlje već smanjile, odnosno i dalje smanjuju vojne potencijale u skladu s utvrđenim NATO standardima, ali i Dejtonskim mirovnim sporazumom, kao što je slučaj sa Srbijom i Crnom Gorom, u skladu s utvrđenim omjerom 5:2:2. Što se tiče Informacije koja se trenutno razmatra, smatra da je pružila dovoljno podataka o regrutnom sastavu u oba entiteta, da osvrt na moratorij za služenje vojnog roka kao logičan slijed upućuje na ukidanje entitetskih ministarstava. U vezi s navedenim pitanjem moratorija, zamolio je za malo vremena za obavljanje još nekih političkih konsultacija, te da se cijelo pitanje reformi posmatra kao jedinstven paket. U slučaju moratorija ili, pak, ukidanja regrutnog sastava, u narednom periodu trebalo bi razmotriti posebno pitanje edukacije mladih ljudi putem različitih formi obuke o vojsci. Ova obuka ne mora se vršiti posredstvom Ministarstva odbrane BiH, već se može provoditi i na druge načine. U vezi s pitanjem rezervnih snaga u BiH, istaknuo je da one danas postoje samo na

papiru, a faktički ih nema. Stoga će se zalagati za efikasne rezervne snage koje će činiti profesionalna vojna lica nakon penzionisanja, uz određene uslove. U odnosu na cjelokupnu reformu odbrane, istaknuo je da je rok za reforme koji je odredio visoki predstavnik pri kraju, te da se nada da će se što prije u parlamentarnoj proceduri naći izmjene i dopune Zakona o odbrani BiH i Zakon o službi u OSBiH.

Branko Zrno istaknuo je da su ponuđena rješenja Komisije za reformu odbrane - posmatrano sa svih aspekata - dobra, a u narednom periodu mogu se samo dorađivati. Stoga nije iznenađen rezultatima ispitivanja javnog mnjenja o predmetnim pitanjima. Naglasio je potom da ćemo nastojati ispoštovati utvrđene rokove za provođenje reforme i zahvalio se kopredsjedavajućim na prisustvu i iscrpnom informiranju.

Momčilo Novaković smatra da ovu informaciju ne treba upućivati u daljnju parlamentarnu proceduru jer ona dijelom podrazumijeva i stepen tajnosti, a predstavlja samo dio paketa reforme odbrane.

Branko Zrno i Šefik Džaferović smatraju da javnosti treba predočiti sve informacije, pa i ovu, uz jasnu poruku da Zajednička komisija u potpunosti podržava aktivnosti Komisije za reformu odbrane.

Po završetku rasprave članovi Zajedničke komisije primili su k znanju Informaciju, te jednoglasno usvojili zaključak da se Informacija ne upućuje u dalju parlamentarnu proceduru, jer predstavlja radni materijal i samo je jedan dio reformskog paketa.

Takođe, jednoglasno je odlučeno da se sredstvima informiranja kratkim izjavama obrate dr. Raffi Gregorian, Seada Palavrić i Boško Šiljegović.

Ad. - 3. Informacija o stanju sigurnosti Bosne i Hercegovine u 2004. godini (Ministarstvo sigurnosti BiH)

Prije razmatranja ove tačke dnevnog reda, Boško Šiljegović predložio je da se dostavljeni Izvještaj o radu Policije Brčko Distrikta BiH razmatra kao informacija na narednoj sjednici Zajedničke komisije, što je jednoglasno prihvaćeno.

Ljiljana Trišić istaknula je da će ubrzo u parlamentarnu proceduru biti dostavljena Informacija o stanju sigurnosti za šest mjeseci 2005. godine, a potom dala uvodne napomene o Informaciji o stanju sigurnosti Bosne i Hercegovine u 2004. godini. U vezi s Informacijom o kojoj se raspravlja na ovoj sjednici, naglasila je da urađena na osnovu podataka koje su dostavile institucije iz oblasti sigurnosti, te da je sačinjena i metodološki prilagođena Zakonu o slobodi pristupa informacijama, Zakonu o policijskim službenicima. Napomenula je i da je Zakon o zaštiti podataka u proceduri.

Šefik Džaferović smatra da je Informacija dobro koncipirana i treba je primiti k znanju.

Momčilo Novaković istaknuo je da su u ovoj informaciji otklonjeni neki dosadašnji nedostaci na koje su ukazivali članovi Komisije te da je Informacija kompletnija i sadrži više podataka. Potom je posebno istaknuo nezgodljivost aktivnostima DGS-a, navodeći da aktivnosti u graničnom pojasu nisu ispunile očekivanja. Stoga imamo poroznu granicu, iako je uloženo dosta napora i sredstava da se granica potpuno obezbijedi. Posebno je naglasio da je u DGS-u potrebno uraditi mnogo više na kvalitetu zaposlenih, te provesti internu kontrolu nad zaposlenima kako bi se onemogućilo daljnje negativno ponašanje pojedinaca u DGS-u. U tom smislu predložio je zaključak da DGS sačini i dostavi kompletnu Informaciju o obavljenoj internoj kontroli i njenim rezultatima. Potom je predložio određene izmjene i dopune dijela Informacije koji reguliše zaključke i mjere. U tački 2., koja se odnosi na kadrovsku popunjenost DGS-a, predloženu mjeru treba preformulirati, tako da bi se trebala odnositi na utvrđivanje sadašnjeg kvaliteta popunjenosti ove službe, a s ciljem smanjenja ilegalnih prelazaka i nedozvoljenih prijenosa robe, dok su ostale mjere prihvatljive. U okviru mjere pod brojem 8., koja se odnosi na Zakon o drogama na nivou BiH, istaknuo je da je ovaj zakon bio u proceduri, ali se ne zna njegov trenutni status.

Seada Palavrić naglasila je da je ova cjelovita informacija dobrodošla, te da se nakon obavljene posjete članova Komisije Terenskoj kacerariji i jedinicama u Brčkom i Bijeljini jasno može vidjeti

da DGS ima problema koje pokušava riješiti. Ali, evidentno je i da Vijeće ministara BiH nema osjećaja za njihovo rješavanje. Jedan od problema DGS-a je i nedostatak kadrova. Podržala je prijedloge Momčila Novakovića, te predložila da Komisija donese zaključak kojim bi obavezala nadležne institucije da ovoj komisiji dostave radni materijal budžeta za sigurnost tokom njegove pripreme, kako bi mogli uticati na njegovu strukturu i visinu.

Vinko Zorić predložio je da se u dijelu mjera i aktivnosti, u tački 13., dodaju riječi: «i saobraćajnice», jer nam ne treba signalizacija ako nema saobraćajnica, od kojih su inače brojne dosta loše. I on smatra da bi trebalo tražiti i budžete drugih institucija u fazi izrade.

Adem Huskić imao je određeni broj primjedbi na Informaciju, iako smatra da je ova Informacija bolje urađena od prethodne. Iz Informacije se ne može vidjeti koji su glavni bezbjednosni problemi u BiH, jer ona mora sadržavati rang-listu najvećih problema kao i iznos potrebnih finansijskih sredstava za njihovo prevazilaženje. Smatra da je trenutno najveći problem pitanje saradnje s Tribunalom u Haagu. Kao drugo značajno pitanje apostrofirao je pitanje terorizma, te da se onda dalje mogu razmatrati već obrađena pitanja. Kao nedostatak Informacije, naveo je nepostojanje akcionog plana za prevazilaženje problema, zatim nepostojanje jasno istaknutog stava Ministarstva sigurnosti BiH o datim problemima, koji u Informaciji predstavljaju samo zbir statističkih podataka. Dalje je naveo nepostojanje potrebnih podataka o radu SIPA-e, kao još nekih institucija. Istaknuo je, također, i da su u Policiji Brčko Distrikta BiH, prilikom posjete, naveli da ih Ministarstvo sigurnosti BiH nije uopće kontaktiralo niti tražilo podatke. U daljnjoj analizi naveo je da nema nikakve sigurnosne procjene u slučaju da BiH postane članica PFP-a i NATO-a, nema stava o ulozi ranijih obavještajno-sigurnosnih službi, pogotovo njihovoj procjeni o djelovanju Al-kaide, stava o radu nekih stranih obavještajnih službi, a rad nekih drugih institucija nedovoljno je obrađen i sl. U dijelu koji se odnosi na terorizam vidljivo je da je procesuirano 385 lica, ali nema podataka koliko ih je osuđeno. U tom dijelu navedene su neke radnje koje se ne moraju nužno podvoditi pod ovu vrstu djela. Informacija se, također, ne bavi pitanjem sigurnosne procjene vezane za odlazak naših vojnika u Irak, kao ni pitanjem maloljetničke delinkvencije. U sklopu dijela mjera i aktivnosti, po njegovom mišljenju, neophodno je istaći aktivnosti na donošenju zakona koji nedostaju ili izradi izmjena i dopuna postojećih zakona, kao što su Zakon o zaštitarskim firmama i Zakon o nabavci i nošenju lakog naoružanja. Takođe je neophodno sačiniti akcioni plan iz koga se može vidjeti daljnja aktivnost SIPA-e, OSA-e, Uprave za indirektno oporezivanje i drugih agencija u borbi protiv svih vrsta nedozvoljenih aktivnosti, te utvrditi prijedlog finansijskih sredstava za realizaciju tog plana. Nakon pauze od 10 minuta sjednica je nastavljena. Odsustvovali su Šefik Džaferovića i Anto Spajić.

Boško Šiljegović istaknuo je da bi bilo dobro da se u DGS-u provede interna kontrola i sačini posebna informacija o tome. Smatra, također, da su prijedlozi Adema Huskića koji se odnose na dio 8. postojeće Informacije prihvatljivi i za Ministarstvo sigurnosti BiH.

Ljiljana Trišić smatra prethodnu diskusiju izuzetno korisnom. Zadovoljna je stavom Zajedničke komisije o potrebi kadrovske popune DGS-a, pri čemu treba riješiti i pitanje smještaja ove službe. Za nju je prihvatljiv najveći broj prijedloga datih u raspravi. Pri tome je naglasila da je aktivnost vezana za saradnju s Haagom ove godine intenzivirana i da ima više podataka nego prethodne godine. U vezi s pitanjem terorizma i postavljanja prioriteta, istaknula je da je ostavljen prostor i Komisiji i domovima da reagiraju i daju svoje prijedloge i mjere. Dalje je naglasila netačnost informacije da Ministarstvo sigurnosti BiH nije tražilo podatke od Policije Brčko Distrikta BiH, jer su dostavili upitnik koji im je bio poslan. U vezi s nedovoljnim podacima o radu SIPA-e, OSA-e i drugih institucija, navela je da ovaj materijal ima formu informacije a ne izvještaja, te ne iskazuje detaljno, već opisno podatke o bezbjednosnoj situaciji. U odnosu na rad stranih obavještajnih službi, istaknula je da Ministarstvo sigurnosti BiH ima samo koordinirajuću ulogu i ne može dati te podatke dok ih ne dobije od institucija nadležnih za tu oblast. Bezbjednosne procjene o odlasku vojnika u Irak nisu davali jer je tek usvojen zakon koji reguliše to pitanje, a ono se također više odnosi na tekuću nego na godinu koju obrađuje Informacija. Što se tiče dijela koji obrađuje prijedloge mjera i aktivnosti, smatra da zakonodavno tijelo treba aktivnije učestvovati i dati svoje prijedloge.

U vezi s potrebom izrade Informacije o maloljetničkoj delinkvenciji, istaknula je da je već predviđena takva informacija.

Adem Huskić potom je naglasio da je zadovoljan datim odgovorima, s obzirom da će dosta pitanja koje je on apostrofirao biti obrađeno Informacijom za šest mjeseci tekuće godine. I on je naglasio potrebu za internom kontrolom unutar DGS-a.

Nakon okončane rasprave Informacija je primljena k znanju i upućena u dalju parlamentarnu proceduru sa sljedećim **zaključkom**:

«S ciljem sprečavanja ilegalnog prelaska ljudi i robe i uopće što kvalitetnije zaštite državne granice Bosne i Hercegovine, Državna granična služba BiH treba u što kraćem vremenu sačiniti posebnu Informaciju o kvalitetu popunjenosti Službe, i, u tom smislu, provesti internu kontrolu rada sadašnjih zaposlenika, te Informaciju dostaviti Parlamentarnoj skupštini BiH na razmatranje.»

Ad. - 4. Tekuća pitanja:

a) Informacija o prigovorima brigadira Faida Heće, Sabrije Zimića i Fehima Bibića na odluku o izboru profesionalnih vojnih lica u Ministarstvo odbrane BiH po raspisanom konkursu

Dragica Hinić ukratko je obrazložila dostavljene prigovore brigadira Faida Heće, Sabrije Zimića i Fehima Bibića na odluku o izboru profesionalnih vojnih lica u Ministarstvo odbrane BiH po raspisanom konkursu i postupak po prigovorima pred Zajedničkom komisijom koji je obrazložen i u pisanoj formi dostavljen članovima Komisije.

Nakon obrazloženja, članovi Zajedničke komisije jednoglasno su zaključili da ova komisija nije nadležna razmatrati pojedinačne podneske lica, jer bi je to dovelo u poziciju da se faktički upliće u tok upravnog postupka, odnosno dalje upravnog spora, a time i miješa u rad upravnih organa i sudova. Stoga će Zajednička komisija, u skladu s Poslovníkom Predstavničkog doma Parlamentarne skupštine BiH, navedene podneske uputiti nadležnoj Komisiji za ljudska prava, imigracije, izbjeglice i azil, vodeći računa o činjenici da ni ova komisija ne razmatra pitanja koja su u toku rješavanja na sudovima i druge sporove, osim ako se radi o neprihvatljivom kašnjenju u postupku ili evidentnoj zloupotrebi vlasti i samovolji na koju ukaže Ombudsmen BiH. Zajednička komisija će, također, o svom stavu informirati podnosiocce prigovora.

b) Zamolnica Misije BiH pri NATO-u u Bruxellu za informiranje o bitnim aktivnostima Zajedničke komisije za odbrambenu i sigurnosnu politiku BiH

Na zahtjev Misije BiH pri NATO-u u Bruxellu, Zajednička komisija donijela je **zaključak**: o svim značajnim aktivnostima iz njene nadležnosti treba blagovremeno informirati Misiju, dostavljanjem posebne informacije ili dostavljanjem izvještaja i zapisnika.

c) Kratka informacija o obavljenoj posjeti članova Zajedničke komisije Brčkom i Bijeljini

Boško Šiljegović ukratko je informirao o posjeti Terenskoj kancelariji DGS-a Sjeveroistok-jedinicama u Brčkom i Bijeljini, zatim Policiji, kao i gradonačelniku i predsjedniku Skupštine Brčko Distrikta BiH od 31.5. do 1.6.2005. godine. Ova izuzetno korisna posjeta iskorištena je za sagledavanje situacije u navedenim strukturama, na osnovu čega je sačinjena i kompletna detaljna informacija. Informacija je primljena k znanju.

d) Informacija o održanom sastanku PSNATO-a u Ljubljani

Halid Genjac ukratko je informirao o održanom zasjedanju PSNATO-a u Ljubljani, po tematskim cjelinama. Neke od tema odnosile su se na ključnu ulogu NATO-a na Balkanu, pitanje klimatskih

promjena na Arktiku, pitanja vezana za područje Kavkaza, pitanje odnosa Kine i NATO-a i transatlantske ekonomije. U govoru generalnog sekretara NATO-a istaknuta je potreba bliže saradnje ove asocijacije i naše zemlje, a na plenarnoj sesiji izvedena je vježba o terorističkom napadu nuklearnim sredstvima i odgovoru NATO-a na taj napad. Informacija je primljena k znanju.

e) Informacija o održanom sastanku sa Hubertom Pirkerom, predsjedavajućim Inicijative Pakta stabilnosti za borbu protiv organiziranog kriminala (SPOC) i prijedlog izbora člana Zajedničke komisije u ovu organizaciju

Boško Šiljegović informirao je o posjeti Huberta Pirkera 2.6.2005. godine, koji je na našu molbu obećao nabavku neophodne opreme za nadzor granice. Zaključeno je da se za narednu sjednicu pripremi informacija u pisanoj formi o ovom sastanku, te donese odluka o izboru člana naše komisije u SPOC.

f) Informacija o odlasku pripadnika deminerske jedinice u Irak

Zaključeno je da se za narednu sjednicu pripremi informacija u pisanoj formi o održanoj ceremoniji povodom odlaska deminerske jedinice u Irak.

g) Informacija o obilježavanju 5. godišnjice rada DGS-a

Boško Šiljegović ukratko je informirao članove Komisije da će 6.6.2005. godine biti obilježena 5. godišnjica rada DGS-a, te da su članovi Komisije pozvani da prisustvuju ovoj godišnjici .

h) Informacija o predstojećim posjetama Makedoniji i Srbiji i Crnoj Gori

Članovi Komisije ukratko su informirani i saglasili su se o predstojećim posjetama radnim tijelima parlamenata Makedonije i Srbije i Crne Gore, koje bi orijentaciono trebale uslijediti od 12. do 15. 7.2005. godine. U posjetama bi bili članovi i osoblje Komisije, te predstavnici OSCE-a i eventualno NATO-a.

i) Vinko Zorić izrazio je nezadovoljstvo radom Službe računovodstva, koja mu nije omogućila plaćanje troškova noćenja u Osijeku, iako su ti troškovi mnogo manji nego u hotelu "Holiday Inn" u Sarajevu. Zbog toga nije posjetio Brčko i Bijeljenu i želio je da se ovo nezadovoljstvo konstatuje u zapisniku.

Zapisnik sačinila
Dragica Hinić

Privremeni predsjedavajući
Zajedničke komisije
Boško Šiljegović